



Fasnacht 2003

J.B.-CLIQUE SANTIANS
Stammgesellschaft

VNS – Verainti Nazioone Santihans

Warnung!

Dieser Zettel ist nicht für SVP Wähler geeignet!

Syt em letschte Joor isch d Schwyz tatsächlich
in der Wält nimm näbesächlich
Der Kofi Annan duet sinniere:
Kaa me die Bärgler integriere?
Am Rügge spyrt er kalte Schwaiss
und dänggt drby an Josy Deiss
Syt im Dezämber duet er zwoor nimme gryyne
und freut sich jetzt uff d Mischeline
Mit ihre lauft das Gschäft wie gschmiert
Voilà – d Aidgenosse sinn integriert!
Im Santihans kenne mir nur stuune
das Theater verdirbt is d Luune
Vo der Vogesestroos bis zum Kannefäld
woont by uns die ganzi Wält:
Kapverder, Spanier, Mexikaner
Russe, Pole, Hannoveraner
Inuit, Schotte und e paar Saudi
hänn mit de Vietnamese s Gaudi
Nigerianer, Brasilianer
und drzue e baar Stadtindianer
Türgge, Zircher, Hockeyaner
Rumäne, Serbe und Bulgaare
hänn mir doo in ganze Schaare
Die alli trifftsch – als bsundere Reiz –
au in unserer Gliggebaiz
zwischeduure heersch – s isch fascht scho Kitsch –
zwei, drei Brogge Baseldytsch
Au in der Gligge gspyrtsch die verschiedene Wälte
richtigs Baseldytsch heersch sälte:
Mir sages luut, es isch kai Schand
der Dambuurescheff wohnt im Baselland
der Voortrabscheff kunnt us Hamburg-Altona
und e Gummiduume us Ascona
der Dambuurmajor, die Guggummere,
fahrt en achtesächzger Nummere
und was wotsch vonere Pfyffere erwarte
noch vier Joor Kölner Prinzegarde?
Das alles kenne mir preschtiere
mir joomere nit, mir integriere
Unsere Zug isch multikulturell
wenn me guet luegt gseets jede Gsell
Zwische em Junteross linggs vorne

und em Dambuor rächts hinde
kaasch die Verainte Nazioone Santihans finde
Mir hänn do nit lang schtudiert
und aifach alli integriert
Mir zaige zem Byschbil em grosse Root
dass das an der Fasnacht goot
– isch er wirgglig so dernäabe –
dr Draum vom friidlig zämmeläabe?
Mit e bitz Hirni und au Humoor
giengtis au im Räscht vom Joor
Doch das goot scho dief in d Philosophie
und basst au nyt zur Partei-Strategie
No schlimmer isch es wälpolitisch
Froogesteller sind scho z kritisch
Bisch nit fir d Yänggi, isch das e Misch
wirdsch registriert als Terrorischt!
Derby simmer doch harmlos, wänn nyt duure stiere
numme am Cortège demonschriere
die Fasnachtsdääg so richtig griesse
und zwischeduure s Comité griesse
drumme, pfyffe, intrigiere
und immer wieder integriere!
Mit der VNS eso uff d Gass
das mach doch alle riesig Spass
Zem Zyschtignoomidaag no ne Tipp, e haisse,
uff em Minschterblatz kasch go Ladärne gnaisse.